

Sebija Izetbegović
Zastupnica u Skupštini Kantona Sarajevo

Bosna i Hercegovina
Federacija Bosne i Hereegovine
Kanton Sarajevo
Skupština Kantona Sarajevo
n/r predsjedavajući Skupštine Kantona Sarajevo

Uputiti: Vladi Kantona Sarajevo

PREDMET: Inicijativa za obezbjeđivanje svakodnevnog popusta od 70% na ski-passove i besplatnog javnog gradskog prevoza na olimpijske planine **Bjelašnica i Igman** u periodu od 05.01.2026. do 25.01.2026. godine

Poštovani,

U skladu sa članom 213. Poslovnika Skupštine Kantona Sarajevo, upućujem Vladi Kantona Sarajevo **inicijativu** da, u saradnji sa resornim ministarstvima, KJP „ZOI '84“, te javnim preduzećem **GRAS**, obezbijedi da se u periodu **od 05.01.2026. do 25.01.2026. godine**, tokom zimskih školskih raspusta, učenicima osnovnih i srednjih škola, kao i studentima sa prebivalištem u Kantonu Sarajevo, omogući:

- **svakodnevni popust od 70% na dnevne ski-passove,**
- **besplatan organizovani javni gradski prevoz** na olimpijske planine Bjelašnicu i Igman.

Predlaže se da javni prevoz organizuje **GRAS**, i to u **dva termina dnevno**, sa polaskom ispred **Zemaljskog muzeja BiH** prema Bjelašnici i Igmanu, te povratkom sa Bjelašnice i Igmana prema Zemaljskom muzeju. Za korištenje ovog prevoza važila bi **đačka, odnosno studentska karta**, kao dokaz statusa korisnika ove mjere.

OBRAZLOŽENJE

Kanton Sarajevo se, posebno u zimskom periodu, godinama suočava sa **ekstremno visokim stepenom zagađenja zraka**, koje u pojedinim danima dostiže nivoe opasne po zdravlje stanovništva. Djeca i mladi spadaju u **najugroženije kategorije**, jer dugotrajno izlaganje smogu i suspendovanim česticama direktno utiče na respiratorno zdravlje, koncentraciju i opće psihofizičko stanje.

Iako se o problemu zagađenja kontinuirano govori, činjenica je da **sistemska rješenja nisu dala brze i vidljive rezultate**, te su građani Kantona Sarajevo i dalje prepušteni zimama provedenim u magli, smogu i zatvorenim prostorima.

Ovom inicijativom želi se ponuditi **konkretna, kratkoročna, ali društveno odgovorna mjera**, kojom bi se djeci i mladima omogućilo da značajan dio zimskog raspusta provedu **na čistom planinskom zraku**, uz fizičku aktivnost, rekreaciju i boravak u prirodi.

Istovremeno, ova mjera bi imala i **pozitivan zdravstveni, socijalni i preventivni efekat**, smanjujući izloženost zagađenju, rasterećujući urbanu zonu Kantona Sarajevo, te podstičući zdrav stil života.

Dodatno, ovakva inicijativa doprinosi i **boljoj iskorištenosti olimpijskih planina**, jačanju domaće zimske turističke ponude i afirmaciji Bjelašnice i Igmana kao javnog dobra dostupnog svim građanima, a ne isključivo privilegovanim kategorijama.

Cijeneći sve navedeno, smatram da Vlada Kantona Sarajevo, zajedno sa nadležnim institucijama i javnim preduzećima, ima i **društvenu i moralnu obavezu** da podrži ovakvu inicijativu u interesu djece, mladih i javnog zdravlja.

S poštovanjem,

Sarajevo, 29.12.2025. godine

Sebija Izetbegović Zastupnica u Skupštini Kantona Sarajevo